

北京圖書館 編

北京圖書館藏珍本
年譜
叢刊



第 3 冊

北京圖書館出版社


□ 北京圖書館 編

北京圖書館藏珍本

年譜叢刊

北京圖書館出版社

第 3 冊



第三冊目錄

孔子年譜	一
孔子年譜	七一
孔子年譜輯注	一一一
孔子年譜	二一九
孔子編年	二三三
先聖年譜考	三九三
至聖譜考	四三九
孔子年譜	六一一
孔子年譜	六五九
子路年表	六七三
卜子年譜	六八七

附載

孔子世系

微仲

宋公稽

丁公由

襄公熙

弗父何
厲公方祀

宋公周

世子滕

正考父

孔父嘉

木金父

挈夷

防叔

伯夏

叔梁紇

孟皮伯尼
丘仲尼

鯉伯魚

伋子思

白子上

傲子家

榘子直

穿子高

紉子文

最子產

斌子順

鮒子魚

元

育後各隨

騰子襄

威

讓子士

員季中

武

安國子國

左傳昭七年魯大夫孟僖子將死屬其大夫曰吾聞將有達者曰孔丘聖人之後也而滅於宋

齊太史子與謂南宮敬叔曰孔子先聖之嗣自弗父何以來世有德讓天所祚也

家語曰孔子之先宋之後殷微子啓帝乙之元子紂之庶兄以圻內諸侯入爲王卿士微國名子爵武王伐殷封紂子庚於朝歌使奉湯祀後武庚與管蔡霍三叔亂周周公東征罪人斯得乃改命微子後殷國於宋啓卒弟仲思衍嗣微子

之後故號仲啓衍俱以徵之號自終至於稽乃稱公迨弗父
何以國讓弟厲公何之後遂世爲宋卿至孔父嘉五世親盡
別爲公族始以孔爲氏四十七代孫傳推譜牒曰卿有孔張
出於子孔衛有孔達魏有孔惺出於姬姓皆非孔氏後蓋姓
同而族異孔氏子姓爲先聖後者世爲魯人同居祖廟

家語附載孔子世系有據而可徵今按宋潛溪先生題孔氏譜系復有不同併附載於後以備考政

神明之胄莫盛於闕里孔氏宜其文獻有足徵者今竊觀其

家譜牒則互有得失姑舉其一二辯之一譜云順一名謙生鮒騰樹鮒生隨騰字子襄生忠忠生武安國武生延年延年生霸霸生福福生房房之從弟某生尙安國生卬卬生驩驩生立立之從弟吉生何齊樹一作祔生聚聚一作彥生威威生琳琳生黃茂茂生宣一譜云謙生鮒滕樹祔祔生育滕生彥貞彥生成貞一名忠忠生武武生安國延年延年生霸霸之下不甚殊安國生黃卬茂黃之曾孫尙生疇疇生賢卬生驩吉驩吉生立何齊立生元元生子建茂生宣樹三傳至琳其後不書祔生最最生讓讓生員據前譜言之則安國與武爲兄弟黃茂皆琳之子

而驩吉爲兩人尙乃霸之曾孫樹卽是祔聚一名彥實樹之子也據後譜言之則延年與安國爲兄弟黃茂皆安國之子而驩吉只一人尙乃黃之曾孫祔卽非樹彥實滕之子也濂竊考之後譜謂武生延年安國者據史記前譜謂忠生武安國者據家語及前漢書固各有所依憑第司馬遷與安國同時而班固乃出遷後家語亦漢之諸儒所錄似當以史記爲正也孔叢子云子國生子卬子卬生仲驩子國安國字也太史公云安國生卬卬生驩皆不聞言驩吉者非特此也漢成帝綏和元年二月封吉爲殷紹嘉侯三月進爵爲公恩澤侯表綏和元年二月孔何齊以殷後孔子世吉之嫡子封紹嘉侯或者雖疑父子不應同封而吉固自爲一人明矣漢劉琳府君碑鉅鹿太守孔尚撰尙自言承曲阜伯之裔自伯魚至武十世無封曲阜者唯安國有

之尙爲黃之曾孫亦無疑者若鮒與祔雖同音蔡文侯昭侯相
去五世皆名中古人尚質未必若是拘拘有以二字音同而疑
無此人其亦過哉孔氏五十五代孫克仁以譜圖未備有志於
纂修之事間請濂撰序以冠篇端濂恨讀書不博兼之老嫗多
病舊學廢忘無以究知其詳因畧疏所聞綴之卷末孔氏子孫
以學行知名者代有其人而克仁亦以文章自顯幸爲起其疵
繆焉

濂旣爲孔君題闕里譜系一書復謂之曰孔子傳至四十二
代光嗣遭孔末之難末乃灑掃戶孔景之後欲冒襲封於是
盡殺諸孔氏時光嗣爲泗水令其妻張夫人生仁玉始九月
夫人遂祕養之及長再襲封卒贈兵部尚書兵部生四子曰
宜曰憲曰冕曰昺今之南北裔如曲阜之崇聖苗孔二邨所

居及若古一名博端友端朝之遷衢端植之遷鄂瑄之遷撫
瓚之遷吳興皆其子孫固不可以不謹其傳而於正外二支
尤所當明辯之也頗聞前輩言元貞二年二月官中所定戶
版闕里正支爲戶凡一十有二分爲五位所謂五位者則太
子中舍國子博士中散大夫侍郎襲封也若外院孔氏乃闕
里子孫灑掃戶每歲輸入祭祀錢者其爲戶凡三十有一分
爲五院所謂五院者則宅上洙泗三傳文登寧陵也子宜述
其事庶幾他日有所於考而無涇渭混淆之患孔君曰此克
仁之志也願爲我續書之辭不獲命復爲附麗題識之左以
爲後來纂修者之一助云

孔子年譜



海昌張次仲元祐氏

全編

武林沈繼震子起氏

已酉周靈王二十年魯襄公二十有一年冬十月二十一日庚子孔子生于魯昌平鄉陬邑

按先是戊申孔父叔梁紇與母顏氏徵在同禱于兗州尼丘山懷妊十有一月而生孔子因名丘字仲尼或云字廼孔子年長時所取蓋不忘父母禱生之所自也按史稱生而首上圩頂故因名曰丘非也因禱于尼丘而命名故卽字仲尼孔子之生傳記所載歲月不同公羊氏云襄公二十一年冬十有一月庚子孔子生穀梁氏之紀年與日同公羊而謂冬十月孔子生則與公羊實差一月史記世家云孔子生于襄

公二十二年則與公穀實差一歲日則與公羊同月則與穀
梁異或以二十一年誤爲二十二年者蓋以周正十一月屬
之明年也是不知三代改正朔從未嘗改時月也宋景濂氏
曰司馬後於公穀孔子所生之年當從公羊氏穀梁氏然以
春秋長曆考之二十一年已酉十一月無庚子庚子乃在十
月之二十一日所生之月當從穀梁氏今依景濂氏所辨正
庚戌周靈王二十有一年魯襄公二十有二年孔子二歲
辛亥周靈王二十有二年魯襄公二十有三年孔子三歲
壬子周靈王二十有三年魯襄公二十有四年孔子四歲
父叔梁紇卒葬于防山

癸丑周靈王二十有四年魯襄公二十有五年孔子五歲
甲寅周靈王二十有五年魯襄公二十有六年孔子六歲與羣

兒嬉戲常陳俎豆設禮容羣兒化效相與揖讓

乙卯周靈王二十有六年魯襄公二十有七年孔子七歲入鄉學

按家語圖說云孔子七歲入晏平仲學吳嘉謨曰按左傳知平仲之年長于孔子但平仲乃孔子友也謂入平仲學者豈爲童子時嘗入平仲所設之鄉學耶愚按平仲所設鄉學當在齊豈孔子七歲嘗適齊耶

丙辰周靈王二十有七年魯襄公二十有八年孔子八歲

周靈王崩

丁巳周景王元年魯襄公二十有九年孔子九歲

戊午周景王二年魯襄公三十年孔子十歲

己未周景王三年魯襄公三十有一年孔子十二歲

魯襄公薨

庚申周景王四年魯昭公元年孔子十二歲
辛酉周景王五年魯昭公二年孔子十三歲
壬戌周景王六年魯昭公三年孔子十四歲
癸亥周景王七年魯昭公四年孔子十五歲
按論語子曰吾十有五而志于學

甲子周景王八年魯昭公五年孔子十六歲
乙丑周景王九年魯昭公六年孔子十七歲
母顏氏徵在卒殯于五父之衢合葬于防山

按闕里誌以昭公六年爲孔子十六歲聖母卒向誤爲庚戌
生故每差一歲耳 按史記叔梁紇死葬于防山防山在魯
東由是孔子疑其父墓處母死乃殯五父之衢耶人輓父之

母誨孔子父墓

檀弓作問於
邾曼父之母

然後往合葬于防焉又按檀弓

孔子既得合葬于防曰吾聞之古也墓而不墳今丘也東西
南北之人也不可以弗識也於是封之崇四尺孔子先反門
人後雨甚至孔子問焉曰爾來何遲也曰防墓崩孔子不應
三孔子泫然流涕曰吾聞之古不修墓據檀弓云孔子先反
門人後則合葬其母時在設教之後當非卒年也未確徵其
何年故并紀此

丙寅周景王十年魯昭公七年孔子十八歲居喪

丁卯周景王十有一年魯昭公八年孔子十九歲居喪

戊辰周景王十有二年魯昭公九年孔子二十歲娶于宋并音堅

官氏

己巳周景王十有三年魯昭公十年孔子二十一歲家貧始爲

委吏而科量平更爲乘田而畜養蕃息是年生子鯉

按家語圖昭公十年孔子貧且賤因季平子代立爲貧而仕始爲委吏則有粢盛之供祭器祭品之設入而助祭于太廟故每事問也又云孔子先爲委吏卽以是年爲乘田是兩官在一年也 按家語圖孔子二十一歲生子適魯昭公以二鯉魚賜之孔子榮君之貺故因以鯉名其子而字伯魚吳嘉謨曰按孔孟圖譜不以爲委吏紀于此年非也孔子若未爲臣則匹夫之名不登于仕籍君民禮隔昭公何爲而有二鯉之賜乎觀此則是年爲委吏也明矣

庚午周景王十有四年魯昭公十有一年孔子二十二歲始教于闕里顏路之徒受學焉

辛未周景王十有五年魯昭公十有二年孔子二十三歲在魯